

半

厂

叢

書

(四)

復堂日記

光緒丁亥六月
徐惟琨書

復堂日記敘

古人劄記之書多不時次宜州家乘按日摭辭供八法范
信中錄刻爲尾附計吳船錄編甲子紀游雖旁及繼業行
程特因兜羅綿頌佛迹下逮明季說部時日記者大率舉
一事與沈存中王厚齋諸書別徑也 國朝劄記之書鱗
比亭林竹汀爲上首亦率以類次蓋彙萃學力排鼓心氣
成一書以自建立非漫焉涉筆而已也仁和譚仲修先生
撰復堂類集如千種一種六卷曰日記則劄記之書也無
子目先後略以時次談藝六七山水交遊閒二三日記者
蓋積日成卷名之也復堂類集罅補傳注有說經之文抉
剔子史闡析詞章有序記論箸之文明言不得比興出之

者又有詩若詞有韻之文日記所及不過論議記載之格於體例與夫奇詞賡義收之不盡棄之可惜者隨時銓別爲一種毘盧遮那足下一光下照阿鼻非師子頻申三昧全力也然其淳箸之淵深取材之宏富渾渾灑灑莫測涯涘蓋劄記之體并包目錄之用黃車九百羸說於議官學問穎脫有自然如此者也至其旨趣超曠詞華簡瞻刻而不露淡而益腴則才聲識振又如山水清音不煩絲竹已以之躡迹沈王隨肩顧錢雖專精稍遜而兼綜過之讀復堂書者卽此漫焉涉筆之一種已可推見全體矣客歲開冬先生郵示日記并屬爲序余惟先生前序拙詩如大鑒禪師明鏡菩提之偈別具傳燈隻眼余序先生書故亦不

得率爾然積時兼旬卒業三復終未得絃外之響茲姑就
所見言之詹詹寡要或得如信中繼業附名黃范以不朽
抑亦幸已會稽馬賡良

日記卷一

復堂類集之四

同治二年五月以前日記淪失不可記憶今自癸亥五月始刪節十之二大都循誦載籍譚藝之言爲多餘事略附不能詮次首尾矣

閱宋子庭先生過庭錄宋氏之學承陽湖莊氏經文大誼不爲繇苛未必盡守家法而精詣獨造莊氏之尙書葆琛先生先生之論語殆可懸之國門

閱南雷文定黎洲老人深明文事固不屑爲斧藻之言也閱全紹衣鮎埼亭集外編至王篤庵墓志慨乎有懷

閱宋鑒尙書考辨平實可傳足並撰異

書肆得陳碩父徵君手校管子蓋就黃蕘圃藏北宋本點

勘子高方治管子以貽之

廣陽襍記五卷順天劉廷獻繼莊撰繼莊振奇士全紹衣曾作傳襍記似隨日偶錄有紀游者有考證瑣事者有述友人論議者有載軼事舊聞者用意甚深其人兼通醫算聲韻治憲之學子高云世無傳本方謀刻之予尤喜其說理論事有獨見至於蓄思隱軫而回曲其詞易代久而猶有魯連田橫之想豈不異哉

閱讀史兵略至唐河北之事深歎李絳杜牧之賢

閱子高管子正誤彙本犖犖大者犖然有富於心

訪長樂謝章鋌校如此君於經籍金石之學均有本末閩中學人可以稱首

閻王源崑繩居業堂集王氏北方之學者深于兵家鑿鑿可見諸施行有志于史則未盡義法劉繼莊與王氏至契所學皆務遠大而文事則王爲渾厚矣源之學師顏習齋顏爲遺老巨儒洞見道體推究人事門徑略似蘇門孫先生顏門之王足以當孫門之湯矣源見顏氏時所學已就得師說益純觀與方侍郎書知其得力所在兵學殆有天授論章邯論苻堅皆稿不可易論謝安稍刻耳予未得見顏氏書子高則篤信之也

閻明遺民詩爲卓爾堪子任換去取殊有意旨中有不易見者

閱東國史略金庾信之將略中國不易觀也忠宣父子之

亂而國人終以不改土風抗蒙古女真之強箕子之澤遠矣辛旽之變誠意計所不及事機之生如此其眾此書大事多闕略安得高麗史并校之

閱莊方耕先生尙書旣見雖未決去僞古文而文事深醇古厚直接荀董猶子葆琛先生無此淵懿也 國朝諸儒如惠氏一家王氏一家莊氏一家皆第一流

陳氏

恭甫先生之後人

藏書有漢學商兌桐城方東樹撰與漢學

諸君子相難若東原茂堂淵如鄭堂誠未足以厭眾志子閱是書益以歎古學之難復而君子立言亦無與來者以口實也

仍閱方耕先生尙書說似是未竟之緒亦由依違僞古文

究有其不可通者在然龔禮部爲莊侍郎墓表言先生有不得已之苦心故其言舜典一則歸慎徽五典以下于堯典而舉孟子所引諸文爲舜典則所以示來學表古誼者在此不在彼是在後人心知其意耳

閱莊先生春秋正誓此絕業也兼采程伊川胡康侯或者尙言旣見之意乎博大深至條舉件繫卓乎屬辭比事之教

翦鎔點次獨孤至之毘陵集淵靜有法度故當淺於李華整於權德輿也如嘯臺頌仙掌銘無愧作者矣

飯于山僧舍香壇觀辛酉歲與徐伯澂諸君題名俯仰今昔慨然久之

莊述祖先生尙書記遺書未刻宋于庭刻之浮溪精舍叢書中校定湯征商誓武成足爲定本可垂國胄度邑祭公芮良夫諸篇於周志左氏春秋傳周志可云精審以附逸書未足以厭後世之志

閱史梅卡詩十二卷刻意學杜筆意深至音節亦合惜乎蹊徑存焉當在王悔生下選卅餘篇暇當錄存

閱過庭錄五卷宋氏說書堆莊先生遺緒爲逸十六篇本不足信之說未嘗不持之有故究未可爲定論舜典附入堯典則僞古文判爲二篇未爲巨謬益稷與大禹皋陶謨同序卽同篇偁名淆濶非呂刑甫刑之比也且康誥酒誥梓材同序異篇書序之例如此不容無說者卽同篇閱劉

印受書序述聞說尙書精深源于宗伯公吾故謂莊氏家學精于惠大于王矣

宋先生欲爲老子章義未成存十餘則于過庭錄皆推究歸藏之旨深美閎約可云絕業竊有意爲續成之末卷載裴晉公與皇甫持正書論唐中葉以前文足爲定論于昌黎獨致貶詞則退之在當日早有違言宋先生錄此篇具有微意

閱劉申受夏時等列于莊氏學小有同異

子高前日有一書與予爭東原爲本朝儒者第一予不答此事非一人私言予故品東原爲第二流之高者

付寫人鈔龔定庵文龔文初集刻本予得之子高寫本數

十篇得之林薌溪及經世文編將合成一集初集中有目無文者補之此外子高欲名之餘集予以原目別有餘集名未知爲何篇不若定爲外集箸吾輩所搜輯云爾何時見孝拱盡得先生遺文勒成全集以貺後人先生于經術非必名家文事則前無唐宋農宗箸議五經大義終始諸篇匡劉之流輩也

夜讀董相賢良策對少時誦之頗扞格不似賈生陳政事疏之當於子心則矜氣爲之今日讀數十過乃如晤語如吾所欲言未嘗言者足爲董子書提要世有學董子之學者必自此三篇始

數月來襍治羣經時讀諸老說經之文筆端句次若有滯

窒不知爲進爲退

欲撰復堂繹聞錄始事於今月之朔蓋襍識經疑或于微言大義有所闕則記之讀近儒書有所辨證亦記之

閱明詩錄予自序似推空同出杜上興到語耳

偶閱齊梁人詩在予詩錄外者亦必義密語堅多可觸類詩至此已足盡變化之用矣

閱無錫丁紹儀杏舫 國朝詞綜補彙本揚王昶侍郎之波集中輩行錯落聞見淺陋予所見近人詞多丁所未見詞綜續編嘉善黃霽青已成數十卷海鹽黃韻珊繼之有成書矣

閱佚存叢書惟隋蕭吉五行大義足可寶貴餘皆無用

閱錢獻之說文斟注譌字甚夥篆體頗工予別有箸論

閱吳棫雲客槎經學說小學說廣韻說子高借之鼂星門

大令

閱楊升庵集升庵文體未粹然不染七子刻畫秦漢之習
詩才情富豔篇體清新放逐之感尤爲沈鬱吾嘗評爲文
外獨絕者也然詩錄外似無遺美四十一卷後襍說引據
多疏經史皆出涉獵論詩文有當家語

閱萬厯野獲編沈景倩禾中裋屨少年文學下中記掌故
多實錄明野史中可傳者也

閱李于麟集高亮深秀正不易得若唐人別集有此人必
推許備至崇遠忽近能不愧然五言擬古詩實有獨到不